

**PEMBERITAHUAN PERTANYAAN BUKAN LISAN  
DEWAN RAKYAT MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : BUKAN LISAN**

**DARIPADA : DR. KELVIN YII LEE WUEN  
[ BANDAR KUCHING ]**

**SOALAN :**

**DR. KELVIN YII LEE WUEN [ BANDAR KUCHING ]** minta **PERDANA MENTERI** menyatakan jumlah pertambahan pengundi di setiap kawasan Parlimen di seluruh negara selepas 2018 terutamanya dengan implementasi Undi18 dan pendaftaran pengundi automatik.

**JAWAPAN****YB DATO' SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Yang Berhormat, Suruhanjaya Pilihan Raya (SPR) sedang dalam persiapan untuk melaksanakan pindaan Perkara 119 Perlembagaan Persekutuan iaitu berhubung umur kelayakan pengundi 18 tahun dan pendaftaran pemilih secara automatik sebagaimana yang diluluskan oleh Parlimen pada Mesyuarat Kedua, Penggal Kedua, Parlimen Keempat Belas seperti berikut:

|              |               |
|--------------|---------------|
| Dewan Rakyat | 16 Julai 2019 |
| Dewan Negara | 25 Julai 2019 |

2. Persiapan yang sedang dilaksanakan oleh SPR bagi pelaksanaan umur kelayakan pengundi 18 tahun dan pendaftaran pemilih secara automatik adalah meliputi:

- (i) pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan;
- (ii) penyediaan *standard operating procedures* (SOP); dan
- (iii) penyediaan sistem serta infrastruktur.

3. Di samping itu, SPR juga telah mengenal pasti beberapa tindakan yang perlu dilaksanakan sebelum pelaksanaan umur kelayakan pengundi 18 tahun dan pendaftaran pemilih secara automatik seperti berikut:

- (i) membuat semakan maklumat bakal pemilih;
- (ii) membuat semakan di lapangan yang melibatkan bakal pengundi berumur 90 tahun dan ke atas;

- (iii) semakan di lapangan ke atas alamat untuk memastikan penentuan bahagian pilihan raya yang tepat;
- (iv) sesi libat urus dengan semua pihak-pihak yang berkepentingan;
- (v) program pendidikan pengundi kepada bakal pemilih; dan
- (vi) menyemak keperluan logistik bagi persediaan menghadapi Pilihan Raya Umum Ke-15 yang akan datang

4. SPR sedang mengadakan proses Semakan Pra-Pendaftaran Pemilih Automatik (SPPA) sehingga 31 Oktober 2021. SPPA diadakan bertujuan memberi peluang kepada warganegara Malaysia berumur 18 tahun dan ke atas sehingga 31 Disember 2021 dan belum mendaftar sebagai pemilih untuk menyemak dan mengesahkan maklumat mereka dengan SPR sebelum didaftarkan sebagai pemilih secara automatik.

5. SPR menjangkakan semua persiapan yang sedang diambil tindakan termasuklah menangani isu-isu yang berkaitan ini akan dapat diselesaikan dan seterusnya melaksanakan umur kelayakan pengundi 18 tahun dan pendaftaran pemilih secara automatik selewat-lewatnya pada 31 Disember 2021.

6. Justeru, SPR tidak mempunyai maklumat jumlah pengundi bagi semua bahagian pilihan raya Parlimen di seluruh negara yang meliputi bakal pemilih berumur 18 tahun dan ke atas memandangkan nama bakal pemilih berumur 18 tahun dan ke atas ini masih dalam proses pra-pendaftaran pemilih dan belum diperaku mengikut Peraturan-Peraturan Pilihan Raya (Pendaftaran Pemilih).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : BERTULIS**

**DARIPADA : DR. KELVIN YII LEE WUEN  
[ BANDAR KUCHING ]**

**SOALAN**

**DR. KELVIN YII LEE WUEN [ BANDAR KUCHING ]** minta **MENTERI KESIHATAN** menyatakan semua perbelanjaan yang telah dibuat oleh Kerajaan untuk menangani COVID-19 termasuk sejumlah RM5 bilion dari KWAN dari segi perbelanjaan hospital, vaksin, program imunisasi, MySejahtera, dan sebagainya.

**JAWAPAN**

Tuan Yang di-Pertua,

1. Kerajaan telah menyediakan peruntukan berjumlah **RM5 bilion** bagi perolehan vaksin dan logistik vaksin COVID-19 dan lain-lain perbelanjaan bagi pelaksanaan Program Imunisasi COVID-19 Kebangsaan (PICK) menggunakan dana Kumpulan Wang Amanah COVID-19 (KWAN).

2. Setakat **30 November 2021** daripada jumlah RM5 bilion tersebut, Kementerian Kesihatan telah membelanjakan sebanyak **RM4.12 bilion** melibatkan perolehan vaksin, kos pengurusan pelaksanaan pemberian vaksin, penyumberluaran program imunisasi melibatkan pengamal perubatan swasta, bayaran saguhati sukarelawan dan sebagainya.

Sekian, terima kasih.